

Қазіргі жастар неге қызығады?

Қазір жаңа технологияның заманы. Интернетсіз бір күн тұрмақ, бір минутты елестете алмайтын дәрежеге жеттік. Еңбектеген баладан бастап еңкейген қарияға дейін интернетке үңіледі. Ал, мамандар телефонға көп қараудың зардабын жазудайын жазып келеді. Сонда да әлі тілі шықпаған сәбиге телефон ұстаып қоятын болдық.

Ал, біз, Қазақстан жастары осындай алып қасіретті жеңуіміз керек. Бұл үшін не істеген дұрыс? Меніңше, жастар бос уақыттарын текке өткізбеулері тиіс. Бұл үшін салауатты өмір салтын ұстанып, спортпен айналысқандары тиімді деп есептеймін. Шыныққан шымыр болады. Өлар ертеңгі ел қорғаны. Жастар уақыттарын текке өткізбей, спортпен айналысқандары абзал.

Тағы бір айта кетер мәселе, бүгінде жастар кітап оқымайды деген пікір қалыптасқан. Шын мәнінде олай емес. Қазіргі жастар детектив, фантастика жанрына қатты қызығады. Жуырда Жазушылар одағы «Белес» құрылыс компаниясымен бірігіп үлкен жобаны жүзеге асырды. Үш бірдей тамаша роман жарық көрді. «Алқа» баспасынан Мақсат Мәліктің сиам егіздерінің өмірі туралы «Абыл мен Қабыл», Қанат Әбілқайырдың «Ағыраптағы аты жоқ адам», Әлібек Байболдың «Мұтылған» деген мета-романы шықты. «Заманауи қазақ прозасы» деген айдармен шыққан үш кітап та жастардың сүйіп оқитын шығармалары десем, кәтелеспеймін. Бір өкініштісі, осындай қызық та оқылымды кітаптар біздің қолымызға тие бермейді. Өйткені, аз таралыммен шығады.

«Алқа» баспасы заманауи әйел бейнесін сомдаған повестке байқау жариялағанын естідік. Бүгінгі әйел бейнесі! Шындығында, бұл өте күрделі мәселе. Бүгінгі нарық қыспағындағы, замана мың құбылып тұрған шақтағы қазақ әйелдері қандай



болуы керек? Кешегі Нұрилла, Ұлпан, Зере, Ұлжан сияқты әжелердің өнегесін бүгінгі бойжеткендер біліп өсуі тиіс деп ойлаймын. Осы орайда «Әжелер мектебінің» үйретері көп. Біз әр ауылда осындай мектептердің барын естиміз, көріп те жүрміз, қыздар тәрбиесінде олардың атқаратын рөлдері зор.

Біз өзіміз оқып жатқан университетте мемлекеттік жастар бағдарламаларын насихаттау үшін «Жастарға қызмет» деген бөлім аштық. Кәсіпкерлік, қайтарымсыз субсидиялар, тұрғын үй, «Нұрлы жер» бағдарламасының аясында қаншама бағыттар бар? Көп жастар оның бірін білсе, бірін білмейді. Қазір пробацияда жүрген, сотталған жастар жұмысқа тұра алмайды. Біздің бөлім осы жастармен де жұмыс жүргізуді қолға алып отыр. Тағы бір ескерілетіні, қала жастары және жасөспірімдердің 46,9 пайызы ақылы үйірмелерге қатысатыны айқындалды. Бірақ, тіл үйрететін үйірмелердің көпшілігі ақылы. Бұл жастарға қымбат, студенттердің, оқушылардың қалтасы көтермейді. Қала жастарының, оқушыларының және студенттерінің сабақтан тыс уақыттарын тиімді пайдалану мақсатында арнайы тіл үйрететін ақысыз үйірмелер ашу қолға алынды.

Қазіргі таңда жастар туризм саласына қызығады. Сондықтан әлемдегі барлық елдің тарихы мен географиясын жастарға үйрету үшін арнайы бөлім аштық. Расында, жастар шетелге шығуға неге құмар? Олар 18 жасқа тола салысымен виза жасатып, шетелге кетіп жатады. Әлбетте, кез келген адам жақсы өмір сүріп, сапалы білім алып, жан дүниесін байытқысы келеді. Әлеуметтанушылардың пікірінше, қазақстандық жастар Канада мен АҚШ-қа, Германия мен Түркия, Англия мен Францияға барып, білім алуға және жұмыс істеуге құмартады екен. Әрине, сыртта оқып, білім алуға қарсы емеспіз, дегенмен туған жер деген Тәңірді де ұмытпауымыз керек. Әрбір жас елім үшін не істедім деп толғанатын болса, Қазақстан бүгінгіден де көркейе түседі. Жастар неге қызығады деген сауалға жауап берерде мен «өз еліңде жұмыс істегеннен артық ештеңе жоқ» дер едім. Ел ертеңі – білімді жастар.

Ендеше, сапалы білім, саналы тәрбие алып, туған Отанымызға қызмет ету әр жастың басты борышы болуы тиіс.

**Еркебулан ҚУАНЫШБЕК,
М.Әуезов атындағы ОҚУ-дың
журналистика факультетінің
студенті.**